

Dovri insumma ina nova lescha da cultura?

Ils represchentants da la cultura populara han discutà il sboz per ina nova lescha da cultura

■ **(anr/ac) Ils amatur èn cuntents cun la promoziun culturala dal chantun Grischun. Quai è sa resultà da la quarta runda da discussiun da la dumengia passada en il Teater da Cuira. Ina scuntrada lantschada per discutir il sboz per ina nova lescha da cultura per il chantun Grischun.** Ina clera differenza tranter lavur culturala professiunala e quella dals amatur n'han ils participants a la quarta runda da discussiun davart il sboz per ina nova lescha culturala betg vuli u betg pudì far la dumengia passada sin la tribuna dal Teater da Cuira. Tant *Riccarda Sulser*, la presidenta da l'Uniu chantunala dal teater popular sco il president da l'Uniu chantunala da musica *Andi Kollegger* ed il scolast da musica e tranter auter manader da l'ensemble vocal *Incantati Christian Kluckner* sco la producenta dal teater liber *Iris Peng* han accentuà la fritgavla collavuraziun tranter profis ed amatur. E punctuà la pussaivladad da profitar viceversa da la lavur e da la filosofia artistica. La definiziun tgi che saja in profi e tgi in amatur è dentant stada pli clera. Il profi posseda ina scolaiziun artistica e viva da ses engaschi. L'amatur sponsurescha, tenor la definiziun da *Riccarda Sulser*, cun sia lavur da mintga di en sia professiun ils projects artistics ch'el elavura en ses temp liber. Per il president da la cumissiu da cultura, *Köbi Gantenbein*, medemamain preschent a la runda da discussiun, nun è la definiziun profi ed amatur eguala cun la definiziun buna u schleta qualitad. El ha explitgà dad avair vesi projects da fetg buna qualitad ed era projects mediochers independentamain sch'els sajan vegnids elavurads

da profis u dad amatur. Sco president da la cumissiu da cultura ha *Gantenbein* purschi a l'auditori invista en la lavur da la cumissiu. Las diversas dumondas per sustegn finanziel ad occurrenz ed arranschaments culturals vegnan repartids sin ils commembers da la cumissiu che preschentan ils projects en la cumissiu. Quella discutescha e decida per mauns dal schef dal departament e sche la du-

monda surpasa 50 000 francs per mauns da la regenza. Per regla, uschia *Gantenbein*, suondian la regenza u il schef dal departament da cultura las propostas da la cumissiu da cultura.

Lavur transparenta

Ils participants al podi nun èn stads da l'avis ch'i saja da midar il sistem schebain che *Andi Kollegger* ha dumandà sch'i sa-

ja bain opportun sche la regenza stoppia la finfinala decider davart ina contribuiziun a la cumpra dad ina posauna per ina musica. Per la producenta da teater, *Iris Peng*, è la lavur da la cumissiu transparenta ed ella ha vinavant exprimì sia opiniun che la cumissiu saja pronta da prender posiziun vers sias decisiuns. Sin dumonda dal mainadiscussiun, *Luzi Bürkli*, il schefredactor dal «Bündner Tagblatt»,

han ils participants prendì posiziun davart il sboz da la nova lescha da cultura. Las resalvas dad *Andi Kollegger* ch'il vast spazi da la cultura populara vegnia supprimì paran dad esser sparidas. Ils participants èn cuntents ch'il sboz per ina nova lescha resguarda ils interess da la cultura populara e la gronda lavur dals amatur. *Riccarda Sulser* vulesch che la cultura populara vegnissia menziunada specificamain sper la cultura professiunala en la nova lescha. Era *Christian Kluckner* è cuntent cun il sboz da la lescha e vesa sulet anc intgins detagls ch'èn da surlavurar. Ulteriura critica vers il sboz da la lescha nun è stada d'udir nà dal podi. Igl è vegnì remartgà ch'il sboz sa drezzia fitg a la lescha veglia. Uschia è schizunt vegnida discutada la dumonda schebain ina nova lescha saja insumma necessaria. Cunzunt sch'i na saja betg pussaivel da generar dapli daners publics a favur da la cultura grischuna. Il deputà e president da l'Uniu chantunala da musica, *Andi Kollegger*, nun ha fatg grondas speranzas ch'il cussegl grond vegnia ad augmentar quellas contribuiziuns. Era l'appel da *Köbi Gantenbein* als timuns da las organisaziun culturalas dad intimar ils commembers da s'engaschar vers deputadas e deputads dad augmentar las contribuiziuns culturalas han ni *Riccarda Sulser* ni *Andi Kollegger* valità dad avair grond success. Memia fitg sajan las finimiras financialas dal chantun gia francadas en las fracziuns dal cussegl grond. E l'avegnir politic dal sboz per ina nova lescha culturala ha *Andi Kollegger* valità per intschert. Cunzunt sche la Partida liberal-democratica restia tar sia decisiun da refusar il sboz cumplettamain.



Han discutà il sboz da la lescha da cultura ord la vista da la cultura populara: *Köbi Gantenbein*, *Christian Kluckner*, mainadiscussiun *Luzi Bürkli*, *Riccarda Sulser*, *Iris Peng* ed *Andi Kollegger* (da sen.).

FOTO A- CADONAU